

SURA YA NANE

MAENEO MENGINE MUHIMU

Demokrasia na Utawala Bora

Utawala Bora

107. Hatua mbalimbali zimechukuliwa na Serikali kuimarisha utawala bora nchini katika kipindi cha Awamu ya Tatu. Katika kipindi hiki cha 2005-2010 CCM itazielekeza Serikali kuendeleza utawala bora kwa kuchukua hatua zifuatazo:-

- (a) Kuendelea kuendesha Serikali kwa kufuata Katiba ya Nchi, Sheria, Kanuni na Taratibu zilizowekwa kidemokrasia nchini kote kuanzia ngazi ya Vitongoji, Vijiji, Mitaa, Kata, Wilaya, Mikoa hadi Taifa.
- (b) Kuendelea kutoa mafunzo juu ya utawala bora kwa watendaji katika ngazi zote na kuhakikisha kwamba matokeo ya mafunzo hayo yanaiweka Serikali kwenye utendaji ulio wazi.
- (c) Kuzingatia kwa ukamilifu haki za binadamu katika utendaji wa vyombo vya dola.
- (d) Kuliimarisha Jeshi la Polisi kwa kuliiongezea uwezo wa taaluma na zana za upelelezi ili upelelezi wa kesi uwe ukikamilika haraka na hivyo kupunguza kero ya mahabusu kukaa muda mrefu magerezani.
- (e) Kuendelea kupunguza msongamano magerezani.

Sekta ya Sheria

108. CCM itazitaka Serikali ziendelee na hatua zilizoanza kuchukuliwa ili kuiboresha Sekta ya Sheria kusudi nayo itoe huduma bora zaidi kwa jamii. Yatakayosisitizwa katika kipindi hiki ni pamoja na yafuatayo:-

- (a) Kuzifanyia marekebisho sheria za mirathi na zile zinazoonekana kuwakandamiza wanawake.
- (b) Kulipatia ufumbuzi suala la kuanzishwa kwa Mahakama ya Kadhi Tanzania Bara.
- (c) Kuanzisha na kutekeleza mpango maalumu wa kuanzisha Ofisi za Mahakama Kuu katika kila Mkoa.
- (d) Kukamilisha mchakato wa kutenganisha shughuli za upelelezi na uendeshaji mashitaka.
- (e) Kuziimarisha na kuzioanisha sheria zinazohusiana na mapambano dhidi ya rushwa.
- (f) Kutekeleza Mpango wa Uboreshaji wa Mfumo wa Sheria hususani ujenzi wa majengo ya mahakama ya ngazi zote na kuajiri majaji na mahakimu wa kutosha.
- (a) Kuweka mfumo wa kuwasaidia wananchi wasiojiweza kupata msaada wa kisheria.
- (b) Kuweka mfumo utakaowezesha kutumika kwa wanasheria wa awali (*para-legals*) katika mahakama za mwanzo.

Demokrasia na Madaraka ya Umma

109. Katika jitihada za kukuza demokrasia na kuimarisha madaraka ya wananchi, CCM itaona kwamba Serikali zinahimiza yafuatayo:-

- (a) Kuendelea kuimarisha na kutoa elimu ya demokrasia katika ngazi zote na kujenga uvumilivu wa kisiasa nchini.
- (a) Kuendelea kuimarisha mfumo wa **demokrasia ya kibunge** (*parliamentary democracy*) hadi katika ngazi ya halmashauri.
- (b) Kujenga utamaduni unaoheshimu haki ya wananchi kujadili na kuhoji mambo yanayohusu nchi yao na kuheshimu dhamana na haki ya vyombo halali ya kutekeleza maamuzi yaliyofikiwa kihalali ili shughuli za nchi ziendelee.
- (c) Kwamba vyama vya siasa vyenye usajili wa kudumu na pia vyama halali visivyo vya kiserikali vinapewa nafasi ya kuendesha shughuli zao kama ilivyokusudiwa na sheria.
- (d) Kuendeleza mahusiano mazuri kati ya wananchi na Serikali zao kwa kutumia uongozi shirikishi katika kushughulikia masuala yao.
- (e) Kuvihimiza vyama vyote vya siasa kujenga na kuimarisha demokrasia ndani ya vyama vyao.
- (f) Kwamba vyama vya siasa vinakubaliana juu ya maadili yatakayoongoza shughuli zao miongoni mwa wananchi na kuongoza uhusiano kati ya vyama vyenyewe
- (g) Kuhakikisha utaratibu uliopo wa wananchi kuchagua viongozi wao kwa misingi ya demokrasia unadumishwa;
- (h) Kuhakikisha kuwa wananchi wanashirikishwa katika kupanga na kusimamia maendeleo yao;
- (i) Kuendelea kuhimiza serikali za mitaa ziunge mkono juhudi za wananchi za kupambana na umaskini;

- (j) Kuhakikisha kuwa serikali za mitaa zinakuwa na mipango mizuri itakayoziungezea mapato yatakayosaidia kutoa huduma bora za jamii.

Mapambano Dhidi ya Rushwa

110. Serikali ya Awamu ya Tatu imeleta mafanikio makubwa katika vita dhidi ya rushwa. Matokeo mazuri ni pamoja na ongezeko kubwa la mapato ya Serikali kutokana na kuzibwa kwa mianya ya rushwa. Vile vile maafisa wengi wameshitakiwa na wengine kadha kuachishwa kazi n.k. Katika kipindi cha 2005-2010 CCM na Serikali zitaongeza jitihada za:-
- (a) Kuendelea kuchukua hatua za kisheria, kiutawala na kinidhamu kwa wale wote watakaobainika kuhusika na vitendo vya rushwa.
 - (b) Kujenga mazingira mazuri zaidi yatakayowapa wananchi uwezo, ari, na ujasiri zaidi katika kupambana na rushwa, wizi na ubadhirifu wa mali ya umma.
 - (c) Kufuatilia malalamiko ya baadhi ya wananchi kwamba kuna watu wengi wanaolimbikiza mali nyingi kama majumba, mashamba n.k. kuliko uwezo wa mapato halali wanayoyapata.
 - (d) Kuendelea kuziba mianya ya rushwa katika utendaji wa Serikali.
 - (e) Kushughulikia kwa nguvu zaidi malalamiko ya wananchi ya kero ya rushwa ndani ya vyombo vya dola kama vile Polisi na vyombo vya huduma za jamii kama hospitali, shule na mahakama.
 - (f) Katika mafunzo ya elimu ya uraia, wananchi watachochewa kuichukia rushwa katika siasa na kuwadharau viongozi watoa na wapokea rushwa.

Ulinzi na Usalama

111. Katika kipindi cha 2005-2010 Serikali za CCM zitaendelea na utekelezaji wa majukumu yafuatayo kwenye sekta hii:-

- (a) Kuendeleza sera ya CCM ya kuwa na majeshi madogo ya ulinzi wa nchi na usalama wa raia yenye taaluma, zana na vifaa vya kisasa.
- (b) Kuwahamasisha wananchi ili waendeleo kushiriki katika ulinzi wa maeneo yao na kuhakikisha usalama wao na wa mali zao. Utaratibu wa **Polisi Jamii** utawekwa kwa ajili ya kuwa na mfumo mzuri zaidi wa kushirikisha vikundi vya ulinzi wa jadi na makampuni binafsi ya ulinzi.
- (c) Kuvijengea mazingira mazuri vyombo vya ulinzi na usalama na kuendelea kutatua matatizo ya makazi na maslahi ya watumishi wake.
- (d) Kuongeza uwezo wa Taifa wa kupambana na ujambazi na kuzagaa kwa silaha ndogo ndogo.
- (e) Kuandaa upya Sera ya Uhamiaji itakayobainisha masuala ya uraia na ukaazi katika mazingira mapya ya kuelekea ushirikiano katika SADC na Jumuiya ya Afrika Mashariki.
- (f) Kuanzisha na kutoa vitambulisho vya uraia.
- (g) Kuongeza kasi ya urejeshaji wa wakimbizi makwao kadiri hali inavyoruhusu; na pia kuihimiza Jumuiya ya Kimataifa kusaidia uhuishaji wa mazingira na miundombinu iliyoharibiwa na kuwepo kwa wakimbizi;
- (h) Kuendeleza ufufuaji wa JKT uliokwisha kuanza na kuutafakari kwa undani muundo mpya unaolingana na hali ya sasa ili kutekeleza malengo ya awali ya kulinda na kujenga nchi, kuimarisha umoja wa kitaifa na kuwajenga vijana katika uzalendo wa hali ya juu..

Hifadhi ya Mazingira

112. Katika kipindi cha 2005-2010, Serikali za Chama Cha Mapinduzi zitajielekeza kufanya yafutayo katika kuhakikisha kazi iliyoanza ya hifadhi ya mazingira inakuwa endelevu:-

- (a) Kuendeleza juhudi za kukabiliana na tatizo la uharibifu wa mazingira na kutoa elimu kwa wananchi ili kuongeza uelewa wao kuhusu hifadhi ya mazingira.
- (b) Kuhamasisha na kuwezesha utumiaji wa matanuri ya kisasa ya kuchomea mkaa yenye sifa ya kupunguza upotevu wa miti.
- (c) Kutazama uwezekano wa kutumia makaa ya mawe kwa kupikia.
- (d) Kuhamasisha matumizi ya majiko yenye kutumia mkaa/kuni kidogo.
- (a) Kujenga mwamko katika jamii wa kukabiliana na mabadiliko ya tabia ya hali ya hewa nchini (*climate change*).
- (b) Kuendeleza kampeni ya upandaji miti ambayo imekuwa ikifanywa kila mwaka na kuhakikisha kwamba miti inayopandwa inatunzwa ipasavyo, na kuhimiza tabia ya kutokukata miti ovyo.
- (c) Kutoa elimu kuhusu sheria ya mazingira kwa wananchi.
- (d) Kuelimisha wananchi kuhusu umuhimu wa kutenganisha taka ngumu ili kudhibiti uchafuzi wa mazingira.
- (e) Kuhamasisha sekta binafsi kuanzisha viwanda vitakavyotumia taka ngumu kama mali ghafi.

Kujenga Uwezo wa Kukabili Majanga

113. Majanga ni matukio yenye asili ya maumbile au ya binadamu wenyewe ambayo husababisha athari kubwa kwa binadamu, mali na mazingira. Majanga makubwa ni pamoja na tsunami, tetemeko la ardhi, mvua za kimbunga, myoto mikubwa, n.k. Matukio ya mvua za *El Nino* na ajali ya M.V. Bukoba yametuonyesha umuhimu wa nchi kujiandaa kwa zana na maarifa ya uokoaji.

114. Katika miaka mitano ya Ilani hii, CCM itazielekeza Serikali kufanya mambo yafuatayo:-

- (a) Kwa kushirikiana na Halmashauri za Jiji, Manispaa, Miji na Wilaya kujenga uwezo wa kukabiliana na majanga ya moto.
- (b) Kujenga uwezo wa nchi kukabiliana na dharura za ajali za halaiki katika maeneo nyeti na ya watu wengi k.v. Red Cross, hospitali, vyombo vya dola, n.k.
- (c) Kujenga uwezo wa vyombo vya dola wa kudhibiti na kukabiliana na majanga ya kimaumbile kama tsunami, tetemeko la ardhi, tufani na mvua za kimbunga, mafuriko na ukame mkubwa.
- (d) Kuitazama upya Idara ya Maafa ya Serikali kwa lengo la kupata njia za kuiimarisha.

Utafiti na Maendeleo

115. Tume ya Sayansi na Teknolojia ilianzishwa kwa madhumuni ya kuipa sayansi na teknolojia **nafasi ya kati** katika maendeleo ya nchi yetu. Ilikusudiwa pia kuongoza na kuratibu shughuli za utafiti na maendeleo zinazofanywa na taasisi mbalimbali bila uratibu. Kutokana na umuhimu wa utafiti katika sayansi na teknolojia, CCM itazitaka Serikali kuweka mbele hatua zifuatazo:-

- (a) **Utafiti na Maendeleo (*Research and Development – R& D*) pamoja na shughuli za Tume ya Sayansi na Teknolojia kutengewa kiasi cha angalau asilimia 1.0 ya Bajeti ya Serikali kila mwaka.**
- (b) **Kuingia katika utaratibu wa kusajili na kulinda (“*patenting*”) hakimiliki za matokeo ya ubunifu kwa watafiti wenyewe na kwa Taifa.**
 - (c) Kuhamasisha na kuhimiza uzalishaji kibiashara wa zana(prototype) zinazotokana na tafiti mbali mbali ili ziweze kusambazwa kwa watumiaji. Aidha, kwa upande wa kilimo, kuanza uzalishaji kibiashara nchini wa mbegu bora zilizotafitiwa na kuzisambaza kwa wakulima.
- (d) **Kuliingiza Shirika la Nyumbu katika mkondo wa taasisi za utafiti, pamoja na kuhimiza fani yake ya uundaji wa magari kibiashara.**

Vyombo vya Habari

116. Kwa kuzingatia mchango mkubwa unaotolewa na vyombo vya habari katika jamii, katika kipindi cha 2005–2010 CCM itazitaka Serikali zichukue hatua zifuatazo:-

- (a) Kuendeleza uhuru wa vyombo vya habari kwa mujibu wa sheria.
- (b) Kueneza Radio Tanzania Dar es Salaam na Televisheni ya Taifa (TVT) nchi nzima na kuwa hewani kwa saa 24 kila siku.
- (c) Kuanzisha gazeti la Kiswahili la Serikali.
- (d) Kuinua ubora wa taaluma ya habari kwa kushirikiana na wamiliki wa vyombo vya habari vya binafsi.
- (e) Kwa kushirikiana na vyombo vyao vya uwakilishi, kuweka mipango ya kuwaelimisha waandishi wenye vipa ji katika taaluma maalum ili tuanze kuwapata waandishi

wanaoweza kuyasanifu na kuyachambua masuala ya uchumi, siasa, ulinzi n.k. katika vyombo mbali mbali.

Mambo ya Nje

117. Mwelekeo wa sasa wa Sera ya CCM ya Mambo ya Nje na Ushirikiano wa Kimataifa, unaongozwa na **Sera ya Diplomasia ya Uchumi**, hivyo ofisi zetu za Ubalizi zinahitaji ziimarishwe kiutalaamu. Katika kipindi cha 2005–2010, msisitizo utakuwa katika kuendeleza Displomasia ya Uchumi kwa kuchukua hatua zifuatazo:-

- (a) Kuendelea kuiletea nchi yetu maslahi ya kiuchumi kwa kuwavutia wawekezaji wenye mitaji na teknolojia ya kisasa na watalii.
- (b) Kuendeleza sera ya ujirani mwema na nchi jirani.
- (c) Kushiriki katika kuimarisha Jumuiya ya Afrika ya Mashariki, Jumuiya ya Uchumi Kusini mwa Afrika (SADC), Umoja wa Nchi za Afrika (AU), Umoja wa Nchi Zisizofungamana na Upande Wowote na Umoja wa Mataifa.
- (d) Kulitangaza jina la nchi yetu na kuiletea heshima yake miongoni mwa Mataifa.
- (e) Kuendelea kuzishinikiza nchi tajiri kutekeleza ahadi yao ya kutenga asilimia 0.7 ya Pato la Taifa la nchi zao kwa ajili ya misaada kwa nchi maskini.
- (f) Kuielewa kinagaubaga hali halisi ya uchumi wa kimataifa unaotawaliwa na ushindani wa soko na utandawazi, kuendelea kuukosoa mfumo huu maana unazikandamiza nchi za Kusini na papo hapo kujua namna ya kufaidika na fursa zinazoweza kupatikana kwa maslahi yetu.

- (g) Kudai mageuzi katika Umoja wa Mataifa, kwa lengo la kuongeza sauti za nchi zinazoendelea.
- (h) Kuitambua jumuiya ya Watanzania wanaoishi ughaibuni (*Tanzanian diaspora*) na kuweka utaratibu utakaowawezesha kuchangia maendeleo ya Taifa lao.

Utamaduni na Maendeleo ya Michezo

118. CCM inaamini kwamba vijana wa Tanzania wana vipaji vya michezo mbali mbali kama walivyonavyo wenzao wa nchi nyingine za Afrika na za Dunia. Kwa lengo la kuendeleza vipaji hivyo na kuendeleza utamaduni na michezo kwa jumla nchini, Serikali za CCM katika kipindi cha 2005-2010 zitaelekezwa kuisitiza yafuatayo:-

(Utamaduni)

- (a) Kuendelea kuenzi na kulinda historia, mila na desturi nzuri za watu wetu na kuzitokomeza mila na desturi mbaya.
- (b) Kuhimiza matumizi ya sanaa katika kuhamasisha na kuelimisha jamii kuhusu masuala mbalimbali yanayohusu maendeleo ya jamii yetu.
- (c) Kuweka mipango ya kuwatambua wasanii wa aina mbalimbali pamoja na wasanii wasomi na kuimarisha mipango ya mafunzo ya sanaa hadi Chuo Kikuu.
- (d) Kuweka mipango ya kukiimarisha Kiswahili kama kielelezo cha utamaduni wetu.

(Michezo)

- (e) Kujihusisha kwa nguvu zaidi na maendeleo ya michezo nchini ili kuhakikisha kwamba ushiriki wa Watanzania

katika mashindano ya kimataifa unalingana na vipaji vilivyopo nchini.

- (f) Kutenga maeneo kwa ajili ya shughuli za michezo na kuwahamasisha wananchi kushiriki katika shughuli za michezo.
- (g) Kukamilisha ujenzi wa uwanja wa kisasa wa michezo Dar es Salaam na kwa jumla kuimarisha miundombinu ya michezo nchini kwa lengo la kuinua kiwango cha michezo.
- (h) Kuweka mipango ya kuandaa wataalamu katika michezo mbalimbali.
- (i) Kuanzisha vyuo vya michezo na kutumia shule na vyuo kama chemchem ya kuwapata wanamichezo bora wa hadhi ya kitaifa na kimataifa. Mashindano ya michezo katika shule na vyuo, ni mambo muhimu sana
- (j) Kusaidia viongozi wa michezo mbalimbali kwa mafunzo na ushauri ili kupata uongozi ulio adilifu zaidi na kupunguza migogoro isiyokuwa ya lazima.
- (k) Kufufua na kuimarisha michezo ya jadi kama vile mieleka na bao.
- (l) Kuweka msisitizo wa michezo kwa wanaume na kwa wanawake pamoja na mpira wa miguu kwa wanawake.

Watoto

119. Katika kipindi cha 2005-2010 CCM kupitia Serikali zake inakusudia kuimarisha na kuendeleza mambo yafuatayo:-
- (a) Kuimarisha huduma za afya ya mama na mtoto katika zahanati zote katika ngazi za Kata na Vijiji.
 - (b) Kuendelea kuhakikisha kuwa watoto wanapatiwa kinga za magonjwa katika muda unaofaa.
 - (c) Kuimarisha utaratibu wa mashirika ya hiari na watu mbalimbali wanaoshughulikia vituo vya kulelea watoto, pamoja na shule za awali.
 - (d) Kuimarisha na kuboresha viwanja vya kuchezea watoto katika ngazi za Mitaa, Vijiji, na Vitongoji.
 - (e) Kuendeleza vita dhidi ya dawa za kulevya ili kuwakinga watoto wasiathirike na dawa hizo.
 - (f) Kuendeleza vita dhidi ya ajira ya watoto.

Wanawake

120. Chama Cha Mapinduzi kinatambua na kuheshimu nafasi ya wanawake katika maendeleo ya nchi, kwa kuweka bayana shabaha za kuendelea kuwaendeleza kijamii, kisiasa na kiuchumi. Katika kipindi cha 2005-2010, CCM itazielekeza Serikali kutekeleza mambo yafuatayo:-
- (a) Kuongeza ushiriki wa wanawake katika ngazi mbalimbali za uongozi wa kisiasa, kiutendaji na nafasi za maamuzi kwa lengo la kufikia asilimia 50 ifikapo mwaka 2010 kama ilivyokwisha azimiwa na Umoja wa Afrika.

- (b) Kuendelea kuwahamasisha wanawake wazitumie fursa za kisiasa katika nyanja mbali mbali, zikiwemo za uchaguzi katika ngazi zote.
- (c) Kuongeza nafasi na fursa katika ngazi za uteuzi kwenye utawala, uongozi na menejimenti ndani ya Serikali na taasisi zake.
- (d) Kuendelea kupanua na kuongeza nafasi za viti maalumu katika chaguzi za mitaa, vijiji, vitongoji, kamati za shule, kamati za maji, kamati za zahanati, kamati mbalimbali za Bunge na za Taifa, Ubunge na Uwakilishi n.k.
- (e) Kuendelea kuwapatia wanawake fursa ya elimu ikiwemo ya uraia ili waendeleo kutetea haki zao na kushiriki kwa ukamilifu katika shughuli za jamii.
- (f) Kuimarisha mifuko ya mikopo mbalimbali ili waweze kufaidika zaidi.
- (g) Kukamilisha taratibu na hatimaye kuunda Benki ya Wanawake.
- (h) Kujenga mazingira mazuri ya kuziwezesha benki na asasi nyingine zinazotoa huduma ya mikopo kutoa mikopo kwa masharti nafuu kwa wanawake miongoni mwa wananchi wengine.

Vijana

121. Chama Cha Mapinduzi kinatambua kuwa sehemu kubwa ya jamii ya Watanzania ni vijana. Changamoto kubwa ni **kuwaelimisha na kuwashirikisha katika ujenzi wa nchi**. Kwa kuzingatia malengo hayo, CCM katika kipindi cha 2005-2010 itazihimiza Serikali zake kuwaendeleza vijana kwa kufanya yafuatayo:-

- (a) Kuendeleza hatua za kuimarisha elimu nchini na kuhakikisha kuwa elimu hiyo inakidhi viwango vya elimu katika karne ya 21.
- (b) Kuona kwamba elimu ya kujitegemea, elimu ya ufundi na stadi nyingine inasisitizwa.
- (c) Kuona kuwa vijana wanajengeka katika ujasiri, uzalendo na kupenda, kuthamini kazi na kuwa na moyo wa kujitegemea.
- (d) Kuwa na mipango ya kuandaa vijana wataalamu katika fani mbalimbali za maendeleo.
- (e) Kuendelea kuwahamasisha vijana ili waweze kujiunga katika vikundi mbalimbali vya ushirika ukiwemo ushirika wa kuweka na kukopa (SACCOS).
- (f) Kuhamasisha na kuimarisha utoaji wa elimu ya ufundi stadi kwa vijana ili waweze kujiajiri.
- (g) Kuimarisha mfuko wa maendeleo ya vijana katika Halmashauri zote, ili uweze kuwanufaisha vijana wengi zaidi kwa usimamizi mzuri na kuwezesha mfuko huo kuwa endelevu.
- (h) Kuhamasisha vyombo vya fedha ili vitoe mikopo yenye masharti nafuu kwa vijana.
- (i) Kupanua wigo wa harakati za kiuchumi zinazozalisha ajira nyingi ili kuongeza fursa za ajira kwa vijana.
- (j) Kuwaandaa vijana kwa ulinzi wa nchi yao, kujenga taifa na uzalendo wa hali ya juu.

Wazee

122. Katika kipindi cha 2005-2010, CCM itazielekeza Serikali kuendelea na uimarishaji wa mipango ya utoaji huduma kwa wazee kwa kufanya yafuatayo:-
- (a) Kuboresha huduma kwa wazee kwenye vituo wanakoishi.
 - (b) Kuandaa mfumo maalumu wa huduma kwa wazee wasiojiweza kwa kuhakikisha kuwa wanapata huduma za afya ya msingi bila malipo katika vituo vya afya, zahanati, na hospitali zote za Serikali.
 - (c) Kuendelea kuhakikisha kuwa wazee wanaostaafu katika utumishi wa Serikali na taasisi zake wanalipwa mafao yao bila kusumbuliwa wala kucheleweshwa.
 - (d) Kuendelea kutumia uzoefu, hekima na busara zao kwa kadiri inavyowezekana;

Walemavu

123. Katika kipindi hiki cha 2005-2010, Chama Cha Mapinduzi kupitia Serikali zake, kitaendelea kuwashirikisha walemavu katika yafuatayo:-
- (a) Kupanua na kuimarisha fursa za ajira kwa walemavu.
 - (b) Kupanua na kuimarisha fursa ya ushiriki wa walemavu katika siasa na uendeshaji uchumi wa nchi.
 - (c) Kuendelea kuimarisha upatikanaji wa huduma za msingi kama vile elimu, afya, mikopo, na kadhalika.
 - (d) Kujenga mwamko wa kuzingatia mahitaji maalumu ya watu wenye ulemavu katika ujenzi na utengenezaji wa majengo yanayotumiwa na umma.

Wafanyakazi

124. Katika kipindi cha 2005-2010, CCM itaendelea kuwa karibu na wafanyakazi na kuhakikisha kuwa Serikali zinayashughulikia kwa ukamilifu na kwa wakati matatizo yao. Miongoni mwa hatua zitakazochukuliwa na Serikali itakuwa pamoja na:-

- (a) Kutunga sheria mpya ya fidia kwa wafanyakazi wanaoathirika kazini.
- (b) Kuwashirikisha wafanyakazi katika maamuzi yote yanayofanywa na Serikali ambayo yanawagusa.
- (c) Kujenga mwamko miongoni mwa wafanyakazi na waajiri kuhusu dhana ya mapatano ya pamoja (*collective bargaining*) na kuisitiza matumizi ya dhana hiyo katika kujenga mazingira ya maelewano baina ya wafanyakazi, waajiri na Serikali (**utatu**).
- (d) Kusimamia utekelezaji wa sheria na taratibu zinazohusu ajira za wageni.
- (e) Kuanzisha chombo cha uratibu wa shughuli za hifadhi ya jamii, kutokana na kuwepo kwa mifuko mingi ya hifadhi ya jamii.
- (f) Kushirikiana na uongozi uliopo wa wafanyakazi kuandaa mafunzo yanayohusu utetezi wa maslahi ya wafanyakazi katika mfumo wa uchumi wa ushindani wa soko na katika mazingira ya utatu.

Kuhamia Makao Makuu Dodoma

125. CCM itaendelea kuisitiza na kusimamia utekelezaji wa uamuzi wa kuhamishia Dodoma Makao Makuu ya Serikali ya Jamhuri ya Muungano wa Tanzania. Katika kipindi cha 2005-2010, hatua

zifuatazo zitachukuliwa kwa lengo la kuzidisha kasi ya kuhamia Dodoma:-

- (a) Kutunga sheria ya kuitambua rasmi Dodoma kuwa Makao Makuu ya Serikali na kuweka utaratibu wa Serikali kuhamia huko.
- (b) Kujenga kwa kiwango cha lami barabara ya Iringa-Dodoma-Arusha na kukamilisha ujenzi wa barabara ya Dar es Salaam-Dodoma-Mwanza kama mkakati wa kuendeleza mji wa Dodoma ili uweze kuvutia vitega uchumi.
- (c) Kuweka vivutio kwa sekta binafsi ili ishiriki katika uwekezaji kwenye ujenzi wa miundombinu inayohitajika katika ukuaji wa mji, na katika uwekaji wa huduma mbali mbali zinazokidhi mahitaji ya watumishi wa Serikali na wananchi kwa jumla.
- (d) Kuongeza kasi ya Wizara za Serikali kuhamia Dodoma, kwa kuwa sasa Serikali inajenga nyumba nyingi za kuishi watumishi.